

國朝書獻類徵初編卷四十五目錄

卿貳五

王崇簡

艾元徵

傅維鱗

劉鴻儒

王楨

田六善

朱之弼

于嗣登

宋之

王

王

王

國博書林藏書四十五冊

國朝耆獻類徵初編卷四十五

通奉大夫前署江西巡撫江西布政使司布政使湘陰李桓輯

卿貳五

王崇簡

今太子太傅大學士宛平王公在 世祖皇帝時與先太子太保

禮部尚書文貞公後先入翰林文貞公拜國史院學士太傅公亦

遷弘文院學士文貞公之爲禮部也太傅公亦以考績加禮部尚

書然勲階皆次文貞公下故不得追贈其先世及 誥封父母文

貞公之屢得 恩典也輒馳封其本生父母至太傅公之加尚書

始得以一品 誥命贈梁夫人云及 今皇莅政太傅公在中樞

文貞公薨後服闋膺爰立之命次年恭遇 太宗皇帝實錄告成
以勞晉秩太子太傅然後 覃恩及於四世 贈文貞公如其官
梁太夫人亦再 贈一品公既拜 命歎喟屬某曰吾受 國異
數榮及所生顧吾親不得見矣卽銘幽之辭已不及備將揭石墓
道載前人功德表 天子殊恩顧非子文不可敢固以請某惟乙
未歲以貢入京師拜公階下公一見待以國士指授爲文旨要使
稍有所聞以至今者皆公力也敢以不敏辭謹按公行狀及墓銘
碑文爲記其大略如左公諱崇簡字敬哉其先家任邱自公曾祖
諱龍始來京師祖諱鏜考陝西參政加右布政使司諱愛母張氏
三世皆以公 贈禮部尙書妣 贈一品夫人愛無子以兄錦衣

衛正千戶諱爵之仲子爲後卽公也錦衣公及本生嫡母張氏生
母焦氏並得 賜封公七歲喪布政公未幾錦衣公亦歿早孤煢
然嗣母張夫人督之成立情過已出公事兩夫人曲盡孝道二十
六舉鄉試負海內重名爲清流引重中崇禎十六年進士甲申三
月京師破值焦夫人喪給假治葬在外挈家潛奔金陵轉徙吳越
間久之江南平北還時 世祖廣求文學耆宿以充館選首授公
內翰林國史院庶吉士 特免教習預修明實錄除祕書院檢討
歷侍讀國子監祭酒弘文院侍讀學士 詔察明末殉難臣公疏
言內外死事者合二十有八人以上皆得 贈諡時論以爲允遷
詹事府少詹事兼侍讀學士如故以疾請告十二年侍郎戴公明

說薦公可大用 世祖違部議特起之其明年以原官兼弘文院
侍讀學士遷國史院學士及太傅公既遷弘文院 世祖臨朝歎
爲盛事然以父子不可同列擢公吏部右侍郎兼學士尋轉左拜
禮部尙書明年加太子太保公建言帝王廟祀宜及守成令辟因
列商中宗以下七人以上又言宋臣潘美張浚宜罷祀 詔從其
言公學問該博尤諳練歷朝典故居禮官多所建白皆折衷古今
合於經義時議翕然歸重然公自以父子並列六卿彌存謙退以
夙疾請告者再 優詔不許會 世祖崩復固請如前十八年冬
始得 予告康熙三年病良已遂以老乞致仕春秋纔六十三自
是徜徉林下者凡十有五年初公值喪亂播遷本無意當世用遭

遇世祖皇帝以文學被知遇時與道會感激思奮然其確乎不可羈紲以富貴之意時時見於言語發於吟詠後堅請至四卒行其志本朝大臣年未及乞休於主恩方渥之際進退終始卓然大節如公比者前此所未有也公家食益讀書引掖後進爲文章凡四方人士至都者以不及見公爲恥客至攝齊升堂必下階握手酌醴延款恆至夜分乃散其論文曰爲文必本於道道在不
出尋常行習之間自世有道學之名此道之所以日敝也又曰學
莫要於自得知之非艱行之惟艱知而能行此聖賢之所以幾於
得也平生嗜學不倦年七十欲依古人以每歲盡讀五經爲夏課
其爲文雖卮言爛語無非仁義道德嘗爲青箱堂記云階前闢露

臺方丈餘歲之夏秋日暮父子兄弟六七人率坐臺上或莊論詩
書或稱述祖父遺事旁及故舊家世之興衰以爲勸誡一偶不至
徬徨四顧若有缺然者世傳陳仲弓之家門雍穆公蓋近之至今
太傅公秉鈞贊化一本公之家學而推而大之以及於天下則傳
所謂施於有政者豈不然歟公元配梁夫人撫治鄖陽右副都御
史 贈兵部右侍郎諱應澤第二女以淑慎佐公成名孝廉常口
授論語孝經教其子女公年二十卽請置側室廣嗣續其卒時年
三十八公哀思之終身不再娶公薨於康熙十七年十一月某日
上聞震悼 敕給葬祭如故事諡曰文貞太傅公與其諸弟以
十八年四月某日葬公於梁夫人先所窆地畏吾邨之西原後十

年而乾學復表其墓道太傅公名熙公冢子丁亥進士見任太子
太傅保和殿大學士兼禮部尙書加三級梁夫人出餘子賴官監
生湖廣常德府桃源縣知縣卒次然官監教習見任刑部江西清
吏司主事次照廕生見任雲南按察司僉事分巡驛鹽道次燕廕
生見任江南鎮江府知府加二級次默歲貢生見任兵部督捕司
務孫男十一人長克善廕生江西按察使司僉事分巡驛鹽道次
克昌廕生戶部陝西清吏司員外郎加二級克寬監生次克任庠
生克遠庠生克端監生克剛雙鶴蘭蓀穩住存住曾孫男五人長
均次增次基次長麟次仲鳳余及公門垂四十年期待良厚再至
京師公已薨逝自愧迂疏伉直與時齟齬茲請告將行撰公墓文

深媿無所成就辜負知己特書公雅尙及學問得力處以告來者庶幾百世以後聞風興起也夫

右墓表徐乾學撰

公諱崇簡字敬哉其先隸河閒之任邱曾祖龍遷居都下祖鏜父愛本生父爵皆仕明以世德顯公生而穎異少爲諸生有聲左公光斗督學順天得公文以公輔期之公於書無所不窺尤究極六經以爲士君子欲進斯世於三代之盛必以經術爲本嘗論春秋志在尊王而以夏時冠正月豈爲下不倍之義乎孔子所書之春卽周之春正月卽周之正月又云詩之正變以聲不以體宮商角徵羽正也變宮變徵變也一時宿儒翕然宗之丁卯舉於鄉癸未

登進士第明年闖寇陷京師遂盡室南奔 皇清定鼎始開道歸里會 世祖遴選文學侍從之臣首擢公庶常分校丙戌會試升祕書院檢討歷侍讀國子監祭酒弘文院侍讀學士詹事府少詹事以疾告歸時有薦公可大用者 特旨起補原官尋陟國史院學士先是公長子今相國亦爲弘文院學士 世祖顧笑曰父子同官固爲盛事然令肩隨以侍班可乎 特晉公吏部侍郎不數月拜禮部尙書又明年加太子太傅而相國復以考績加禮部尙書公願以盛滿爲憂因夙疾屢疏乞罷皆不允已而 世祖升遐公日夕治 大行喪及 今上登極禮勞劇疾益甚再疏請告得允越三載遂引年致仕公歷官殫心職掌所言皆洞中窾要其在

翰林日有 旨察明季殉難諸臣公疏在內大學士范景文在外
巡撫蔡懋德等宜褒揚以作忠義之氣時喪亂後聞見失實公疏
出遂爲定論及官宗伯奉 詔議祫祭禮言人人殊公言 肇
興 景 顯及 太祖宜南向 太宗宜東向出入證據多宋儒
司馬光諸人所未發又議 大享殿合祀禮公言 本朝所封啟
運山宜附中岳壇天柱隆業二山宜附北岳壇時議者謂北岳恆
山當移祀渾源州不應立廟曲陽公謂趙宋時北岳不在境內以
眞定在汴京之北故移置曲陽考漢書地理志所謂曲陽者有三
惟上曲陽屬常山郡在恆山北谷今之曲陽距恆山絕遠議者言
是又謂勅業守成難易正等如商中宗高宗周成王康王漢文帝

宋仁宗明孝宗皆宜祀歷代帝王廟其議論精卓不磨類若此公
雖歸老於家凡 朝廷有大政士大夫疑不能決者皆就公取正
焉年七十八以壽終竊嘗慨漢高以馬上得天下承秦火之後禮
崩樂壞而當時嫺禮制者僅一叔孫通故儀文草創不足爲萬世
法仰惟我 世祖睿烈宏謨混一區宇卽超然遠覽前世興衰治
亂之由起敝維風整肅百度制作之隆上軼往古固由 聰明天
直亦賴大臣如公等贊襄帷幄以開文明之化嗚呼盛矣 今上
繼承大業 特簡令子以名家碩德之裔由大司馬入典機務而
相國當河海清晏 聖德日新相與黼黻 皇途益取庭訓而光
大之後先濟美宣力 兩朝攷諸史冊可方公之先世王公祐及

其子旦然公以盛德享大年躋耄期則尤不易逮遺命吾儒以理爲主不得隨俗作佛事及公歿 朝廷遣使唁問 賜祭葬如禮 禮臣請易名文貞 制曰可及入祀鄉賢 特命諸王大僚而下 酌酒以奠澤宮之旁冠蓋櫛比父老聚觀嘆息以爲希觀六子長 卽保和殿大學士熙次檇桃源知縣次然建昌知縣次照工部虞 衡司郎中次燕戶部山東司員外次默國子監學正孫克善刑部 山西司郎中克昌陝西司員外俱相國子餘皆績學厲行振振未 艾所著有青箱諸集文在廬陵南豐間而詩格直追初盛唐人平 生薦拔士知名者甚眾

毛際可曰余嘗執經於王浴青先生先生文貞公猶子也故得其

行事尤詳使公得居鼎鉉調變之位必卓然有以自見乃急流勇退若以讓之後人而已不與焉語曰不於其身必於其子孫諒哉

右傳毛際可撰

公諱崇簡字敬哉其先家河閒府之任邱自公曾祖光祿府君始來京師贅於晉故遂爲宛平縣人家譜散落不知其族望所自始凡再傳而家始大錦衣府君性孝友讀書知大義掌東廠太監陳矩賢之欲援府君爲理刑力辭不就布政府君舉萬歷中進士初仕潞安府推官以清節著一府人稱之曰王青天但飲潞安水耳自後歷官皆有聲績歿而董文敏公其昌表其墓府君無子錦衣府君生公甫晬卽以予府君爲之子稍長善屬文旁及詩歌古文

辭皆優爲之相繼受知於國子監司業張公鼎提學御史左公光斗二公素名知人每見公文輒歎曰此公輔器也年二十六舉於鄉又十六年舉進士知公者欲引之入翰林公方請假營焦夫人葬未暇仕也而值流賊破京師遂挈其家播遷東南久之始歸順治三年世祖章皇帝慎簡文學之臣以儲後用公蒙首選卽授內翰林國史院庶吉士特免教習與諸詞臣一體辦事與修明實錄尋除祕書院檢討歷侍讀遷國子監祭酒入爲弘文院侍讀學士遷詹事府少詹事兼侍讀學士如故以病請告十二年刑部右侍郎戴公明說薦公可大用吏部難之世祖素知公遂越部議而起公於家其明年以原官兼弘文院侍講學士尋以太宗